

MAG/avr

ACTA DA SESIÓN ORDINARIA DA COMISIÓN INFORMATIVA DE COOPERACIÓN
LOCAL, TRANSFRONTEIRIZA E DE COORDINACIÓN DAS EMERXENCIAS
PROVINCIAIS DO DÍA 22/05/2026

ASISTENTES

PRESIDENTA: D.^a María Pilar Ramallo Vázquez
VOGAIS: D. Roberto José Álvarez Carrero
D. Javier Tourís Romero, en substitución de D.^a Luisa María
Sánchez Méndez
D. Rafael Domínguez Artime
D. Jorge Cubela Lopez
D. Jesús Vázquez Almuíña
D. Ricardo Martínez Chantada
D. Manuel Alejandro Lorenzo Alonso
D. Juan Pablo Castillo Amigo
D.^a Nuria Rodríguez Rodríguez
D. Gorka Gómez Díaz
D.^a Digna Rosa Rivas Gómez
D. Paco Ferreira González
D. Gregorio Luis Agís Gómez
D. Javier Iglesias Mougán
D. Xosé Cesáreo Mosquera Lorenzo
D.^a Beatriz Lomba Rodríguez

Sendo as doce horas e dez minutos do día vinte e dous de maio do ano dous mil vinte e seis, reúnen no Pazo Provincial os Sres./as. Deputados/as arriba relacionados, en sesión ordinaria, e baixo a Presidencia de D.^a María Ramallo Vázquez. Actúa como secretario o xefe do Servizo de Cooperación, D. Marcos Areán González.

Aberta a sesión pola presidenta, pásase ao estudo dos asuntos incluídos na Orde do Día, sobre os que recaeron os seguintes ditames:

1. Aprobación da acta da sesión anterior (Expte. 2026030757)

Apróbase a acta da sesión anterior (CSV: 2S2XILNX2AKVUHYN), correspondente á sesión ordinaria celebrada o vinte de marzo do ano dous mil vinte e seis por unanimidade.



2. Ditaminar a aprobación do Convenio de colaboración entre a Deputación Provincial e o Concello de Pontevedra para a execución das obras de mellora de accesibilidade na rúa de Rosalía de Castro: treito Manuel del Palacio – Ponte do Ferrocarril ao Porto de Marín, en Pontevedra (Expte. 2026030271)

MAG/jla

DITAME DA COMISIÓN INFORMATIVA DE COOPERACIÓN LOCAL, TRANSFRONTEIRIZA E DE COORDINACIÓN DAS EMERXENCIAS PROVINCIAIS DE DATA 22/05/2026 SOBRE A APROBACIÓN DO CONVENIO DE COLABORACIÓN ENTRE A DEPUTACIÓN PROVINCIAL E O CONCELLO DE PONTEVEDRA PARA A EXECUCIÓN DAS OBRAS DE MELLORA DE ACCESIBILIDADE NA RÚA DE ROSALÍA DE CASTRO: TREITO MANUEL DEL PALACIO-PONTE DO FERROCARRIL AO PORTO DE MARIN, EN PONTEVEDRA (Expte. 2026030271)

De conformidade co establecido nos artigos 123 a 126 do Real Decreto 2568/1986, de 28 de novembro, polo que se aproba o Regulamento de organización, funcionamento e réxime xurídico das Entidades Locais, sométese ao ditame da Comisión Informativa de Cooperación Local, Transfronteiriza e de Coordinación das Emerxencias Provinciais a seguinte proposta de acordo, con carácter previo á súa elevación ante o órgano competente para a súa aprobación:

"ASUNTO: APROBACIÓN DO CONVENIO DE COLABORACIÓN ENTRE A DEPUTACIÓN PROVINCIAL E O CONCELLO DE PONTEVEDRA PARA A EXECUCIÓN DAS OBRAS DE MELLORA DE ACCESIBILIDADE NA RÚA DE ROSALÍA DE CASTRO: TREITO MANUEL DEL PALACIO-PONTE DO FERROCARRIL AO PORTO DE MARIN, EN PONTEVEDRA (Expte. 2026030271)

ANTECEDENTES

- No exercicio das súas atribucións, e ao abeiro da normativa aplicable, a Deputación Provincial e o Concello de Pontevedra desexan establecer as pautas de colaboración para levar a cabo a execución das obras de mellora de accesibilidade na rúa Rosalía de Castro: Treito Manuel del Palacio-Ponte do Ferrocarril ao Porto de Marín, en Pontevedra.
- Para dar cumprimento ao obxectivo referido no parágrafo anterior, nas datas 10/04/2026, 20/04/2026 e 23/04/2026, mediante números de rexistro WEB2026031185, 2026009160 e WEB2026035628 respectivamente, o Concello de Pontevedra remite á Deputación a documentación necesaria para a formalización dun convenio de colaboración entre ambas administracións.
- Segundo o proxecto de execución da devandita actuación, a estimación económica do investimento ascende á cantidade de DOUS MILLÓNS CATROCENTOS CORENTA E SEIS MIL OITOCENTOS CINCUENTA E OITO EUROS CON OITENTA E CATRO CÉNTIMOS (2.446.858,84€) IVE engadido, e propónse que a achega da Deputación sexa de CINCOCENTOS OITENTA E TRES MIL CINCOCENTOS CORENTA E OITO EUROS CON VINTE E TRES CÉNTIMOS (583.548,23€), na



anualidade 2026, con cargo á aplicación orzamentaria 2026/942.9420.762.14 e que a achega do Concello de Pontevedra sexa de UN MILLÓN OITOCENTOS SESENTA E TRES MIL TRESCENTOS DEZ EUROS CON SESENTA E UN CÉNTIMOS (1.863.310,61 €), con cargo á anualidade 2027 do orzamento municipal.

- Revisada polo Servizo de Cooperación, a documentación achegada cumpre os requisitos esixidos pola normativa aplicable para a sinatura do convenio.

Na documentación do expediente, no xestor de CIVIDAS, consta a providencia de inicio de expediente de 15/04/2026 (CSV: BDXXW42KMVIUJZNOK); o informe de supervisión do proxecto emitido por persoal técnico do Servizo de Cooperación de 24/04/2026 (CSV: 2Y6WQ2A4BoXAQLoM); o informe do xefe do Servizo de Cooperación de 24/04/2026 (CSV: MGTJZ3ASNWA6l9F1), o informe de Intervención de fiscalización favorable do expediente de 30/04/2026 (CSV: 9C5NRZNX5YF7BRWG), e a dilixencia de Intervención de data 30/04/2026 (CSV: L3RGKADW12OL35SQ), quedando de manifesto a existencia de crédito adecuado e suficiente para facer fronte ao gasto na aplicación 2026/942.9420.762.14 do orzamento provincial.

- Sométese, así mesmo, ao ditame da Comisión Informativa de Cooperación Local, Transfronteiriza e de Coordinación das Emerxencias Provinciais.

FUNDAMENTOS XURÍDICOS

Lexislación aplicable

- Lei 38/2003, de 17 de novembro, xeral de subvencións (LXS), e o seu Regulamento, aprobado por Real Decreto 887/2006, de 21 de xullo (RLXS)
- Lei 7/1985, de 2 de abril, reguladora das bases do réxime local (LRBRL)
- Lei 5/1997, de 22 de xullo, reguladora da administración local de Galicia (LALGA)
- Lei 39/2015, de 1 de outubro, do procedemento administrativo común das administracións públicas (LPACAP)
- Lei 40/2015, de 1 de outubro, do réxime xurídico do sector público (LRXSP)
- Lei 9/2017, de 8 de novembro, de contratos do sector público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, de 26 de febreiro de 2014 (LCSP))
- Lei 9/2007, de 13 de xuño, de subvencións de Galicia (LSG)
- Real Decreto Legislativo 2/2004, de 5 de marzo, polo que se aproba o texto refundido da Lei reguladora das Facendas Locais (TRLRFL)
- Real Decreto 2568/1986, de 28 de novembro, polo que se aproba o Regulamento de organización, funcionamento e réxime xurídico das entidades locais (ROFRXEL)
- Bases de execución do orzamento da Deputación para o vixente exercicio
- Ordenanza Xeral de Subvencións da Deputación de Pontevedra

Consideracións Xurídicas:



Competencia:

- Artigo 25.2. a), d) e g) da LRBRL, atribúe aos municipios o exercicio de competencias en materia de urbanismo, infraestrutura viaria e outros equipamentos da súa titularidade, estacionamento de vehículos e mobilidade.
- Artigo 31 da LRBRL, que encomenda ás deputacións que dirixan a súa actividade a asegurar a prestación integral e adecuada dos servizos de competencia municipal, recolléndose no seu artigo 36 como competencia propia das deputacións a asistencia e cooperación económica aos concellos. A estes efectos, a Deputación asegura o acceso da poboación da provincia ao conxunto dos servizos mínimos de competencia municipal mediante calquera fórmula de asistencia e cooperación municipal, para o que poderá outorgar subvencións ou axudas con cargo as seus recursos propios para a realización e mantemento de obras e servizos municipais.

Petición e evacuación de informes:

- Artigos 79 e 80 da LPACAP, sobre a petición e a evacuación de informes.
- Artigo 88.6 da LPACAP, que sinala que a aceptación de informes ou ditames servirá de motivación á resolución cando se incorporen ao texto da mesma.
- Artigos 213 e ss. do TRLRFL, sobre o control e a fiscalización da xestión económica que lle corresponde realizar á Intervención.
- Artigo 172 do ROFRXEL, que dispón que o xefe da Dependencia á que corresponda tramitar o expediente deberá emitir un informe, expoñendo os antecedentes e as disposicións legais ou regulamentarias en que funde o seu criterio.
- Bases 47ª e 48ª de execución do Orzamento provincial para o vixente exercicio, sobre o control e a fiscalización da xestión económica, que sinalan a competencia da Intervención para realizar esta función.
- Artigo 24 da LXS que establece que as actividades de instrución comprenderán, entre outras, a petición de cantos informes se estime necesarios para resolver ou que sexan esixidos polas normas que regulan a subvención.

Procedencia do convenio

- Artigo 47 e seguintes da LRXSP, que dispón que os convenios de colaboración constitúen o instrumento adecuado para desenvolver a cooperación en cuestións de interese común.
- Artigo 57 da LRBRL que dispón que a cooperación en servizos locais desenvolverase con carácter voluntario, baixo as formas e nos termos previstos nas leis, podendo ter lugar, en todo caso, mediante convenios administrativos, en conexión co artigo 195.h) da LALGA.
- Artigo 198 da LALGA, que establece que as entidades locais poderán celebrar convenios de cooperación entre si para a máis eficaz xestión e prestación de servizos da súa competencia. No seu apartado 2º dispónse que, a través dos convenios de cooperación, as partes poderán coordinar as súas políticas de fomento dirixidas a un mesmo sector e distribuír as subvencións outorgadas por unha delas; ademais, o apartado 3º sinala que, en especial, as Deputacións Provinciais poderán subscribir, cos municipios da provincia, convenios para garantir o acceso da poboación ao conxunto dos servizos municipais.



- Artigos 199 da LALGA, que, en consonancia co artigo 49 da LRXSP, sinala as especificacións que deberán conter os instrumentos de formalización dos convenios.
- Artigo 6 da LCSP, que exclúe do seu ámbito de aplicación os convenios de colaboración que celebre a Administración Xeral do Estado coas entidades xestoras e servizos locais, organismos autónomos e restantes entidades públicas, ou os que subscriban estes organismos e entidades entre si, salvo que, pola súa natureza, teñan a consideración de contratos suxeitos a dita lei.
- Artigo 2 da LXS, polo que a achega económica da Deputación de Pontevedra ten o carácter dunha subvención. O artigo 22.2 da LXS sinala que se poderán conceder de forma directa as subvencións previstas nominativamente nos orzamentos das Entidades Locais, nos termos recollidos nos convenios e na normativa reguladora destas subvencións. Neste senso, a Deputación, para o desenvolvemento das actuacións que se describen no convenio, ten consignado expresamente no estado de gastos do orzamento provincial do exercicio 2026, dotación orzamentaria na aplicación 2026/942.9420.762.14 e designado como beneficiario ao concello.
- Artigo 28.1 da LXS que establece que a resolución de concesión e, no seu caso, os convenios a través dos cales se canalicen estas subvencións establecerán as condicións e compromisos aplicables de conformidade co disposto nesta lei.

Competencia para resolver

Correspóndelle á Xunta de Goberno, de conformidade co disposto no artigo 10.4 da LXS, que sinala que a competencia para conceder subvencións nas corporacións locais correspóndelle aos órganos que teñan atribuídas tales funcións na lexislación de réxime local, en virtude do establecido nos artigos 34 e 35 da LRBRL e na base 16ª.2 de execución do orzamento provincial.

CONCLUSIÓN

En base ás precedentes consideracións e ó interese público que representa esta actuación para a cidade de Pontevedra, a súa veciñanza e resto de potenciais visitantes da cidade, e aos principios de colaboración e cooperación que se recollen na lexislación vixente, a Deputación Provincial e o Concello de Pontevedra conveñen a súa colaboración neste ámbito co obxecto de desenvolver un réxime de colaboración entre ambas administracións locais para levar a cabo a execución das obras de mellora de accesibilidade na rúa Rosalía de Castro: Treito Manuel del Palacio-Ponte do Ferrocarril ao Porto de Marín, en Pontevedra.

Neste senso, os convenios de colaboración constitúen o instrumento idóneo para canalizar esta colaboración.

O Concello de Pontevedra presentou a documentación necesaria para formalizar este convenio e quedan acreditadas no expediente as razóns de oportunidade, a valoración económica das actuacións a desenvolver e o propio obxecto do convenio.



Por todo o exposto, e á vista dos antecedentes e fundamentos de dereitos aplicables, INFORMO FAVORABLEMENTE a tramitación do CONVENIO DE COLABORACIÓN ENTRE A DEPUTACIÓN PROVINCIAL E O CONCELLO DE PONTEVEDRA PARA A EXECUCIÓN DAS OBRAS DE MELLORA DE ACCESIBILIDADE NA RÚA DE ROSALÍA DE CASTRO: TREITO MANUEL DEL PALACIO-PONTE DO FERROCARRIL AO PORTO DE MARIN, EN PONTEVEDRA.

Este informe non ten carácter vinculante, de feito que o órgano concedente co seu superior criterio decidirá.

Á vista do anterior, elévase á Xunta de Goberno a seguinte PROPOSTA DE ACORDO:

- APROBAR o CONVENIO DE COLABORACIÓN ENTRE A DEPUTACIÓN PROVINCIAL E O CONCELLO DE PONTEVEDRA PARA A EXECUCIÓN DAS OBRAS DE MELLORA DE ACCESIBILIDADE NA RÚA DE ROSALÍA DE CASTRO: TREITO MANUEL DEL PALACIO-PONTE DO FERROCARRIL AO PORTO DE MARIN, EN PONTEVEDRA, cuxo texto literalmente transcrito di como segue:

“CONVENIO DE COLABORACIÓN ENTRE A DEPUTACIÓN PROVINCIAL E O CONCELLO DE PONTEVEDRA PARA A EXECUCIÓN DAS OBRAS DE MELLORA DE ACCESIBILIDADE NA RÚA DE ROSALÍA DE CASTRO: TREITO MANUEL DEL PALACIO- PONTE DO FERROCARRIL AO PORTO DE MARIN, EN PONTEVEDRA

En Pontevedra, na data da sinatura electrónica

INTERVEÑEN

Dunha parte, don Luís López Diéguez, presidente da Deputación Provincial de Pontevedra, na representación legal que da mesma lle atribúe o artigo 34.1.b) da Lei 7/1985, de 2 de abril, reguladora das bases de réxime local (LRBRL).

Doutra, don Miguel Anxo Fernández Lores, alcalde-presidente do Concello de Pontevedra, na representación legal que do mesmo lle atribúe o artigo 124.4.a) do mesmo texto legal.

E actuando dona María Beatriz del Cerro del Río, en calidade de vicesecretaria da Deputación Provincial de Pontevedra, e don José Carlos Castiñeira Piñeiro en calidade de secretario do Concello de Pontevedra, dando fe do acto que se celebra.

Ámbalas dúas partes actúan nas representacións expresadas e recoñécense reciprocamente capacidade bastante para o outorgamento e formalización deste convenio, con base nos principios de colaboración, cooperación, coordinación e eficacia que deben presidir as actuacións das Administracións Públicas e, de común acordo,

EXPOÑEN

I. Que a Deputación e o Concello de Pontevedra comparten como criterio que os concellos, como administración democraticamente escollida, deben ser os axentes protagonistas nos eidos administrativos aos que ten que corresponder a decisión, o deseño e o impulso da acción local e do desenvolvemento das políticas locais; ao tempo que as deputacións deben actuar como institucións que desenvolvan políticas, plans e actuacións que faciliten que concellos e cidadanía poidan acadar os mesmos dereitos e servizos.



II. Que a tales efectos, a Deputación e o concello de Pontevedra veñen coordinando as súas competencias mediante a sinatura de convenios de colaboración para afondar na cooperación administrativa entrámbalas institucións e, particularmente, na cooperación destinada á planificación e execución de proxectos de interese xeral e infraestruturas públicas, tales coma as referidas aos servizos á cidadanía e infraestruturas deportivas, culturais ou viarias, entre outras de carácter diverso.

III. Que ambas administracións locais, en virtude dos principios de colaboración e cooperación recollidos na Lei 40/2015, de 1 de outubro, de réxime xurídico do sector público, teñen como obxectivo común prestar os servizos públicos e cooperar na planificación e execución de proxectos sobre infraestruturas que melloren os servizos á cidadanía.

Consonte aos amentados principios de colaboración, ambas institucións apoian a transformación das contornas urbanas mediante o desenvolvemento de proxectos deseñados cos obxectivos compartidos de implementar medidas de accesibilidade, calmado de tráfico, mobilidade amábel e sostible e seguranza e calidade medioambiental de Pontevedra.

IV. Deste xeito, dentro das súas funcións de colaboración interadministrativas, en data 28/12/2020 asinábase o "Convenio de colaboración entre a Deputación Provincial de Pontevedra e o Concello de Pontevedra para a execución do novo vial de interconexión entre a rúa de Rosalía de Castro (antiga estrada a Marín) e a Avenida de Marín en Mollavao: Acceso oeste a Pontevedra", co obxecto de levar a cabo as obras abranguidas no proxecto do novo "Vial de conexión entre a Avda. de Marín e Rúa Rosalía de Castro, Concello de Pontevedra", deseñado cos obxectivos compartidos de implementar medidas de calmado de tráfico, mobilidade amábel e sostible e seguranza e calidade medioambiental e baixo a premisa de contribuír ao desconxestionamento e diversificación dos tráficos de paso e mellora da conectividade da entrada oeste da cidade, xunto coa creación de novos espazos para a mobilidade peonil.

V. Logo de que en data 27/09/2024, o Pleno da Deputación provincial de Pontevedra e en data 31/10/2024 a Xunta de Goberno Local do Concello de Pontevedra acordaban resolver e dar por extinguido o amentado Convenio, o 26/11/2024, o Concello de Pontevedra e a Deputación provincial de Pontevedra asinaron un novo "*Convenio de colaboración para a execución das obras do vial de conexión entre a avenida de Marín e a rúa de Rosalía de Castro en Pontevedra*", cuxo obxecto era establecer as bases para a colaboración económica e técnica entre a Deputación Provincial de Pontevedra e o Concello de Pontevedra para levar a cabo a execución das obras do vial de conexión entre a Avenida de Marín e a Rúa de Rosalía de Castro en Pontevedra, deseñado cos amentados obxectivos compartidos de implementar medidas de calmado de tráfico, mobilidade amábel e sostible e seguranza e calidade medioambiental urbana, baixo a premisa de mellorar o tráfico e a conectividade da entrada oeste da cidade, xunto coa creación de novos espazos para a mobilidade peonil; obxectivos que agora se pretenden ampliar coa mellora da accesibilidade no treito da rúa Rosalía de Castro co que entesta o novo viario no treito de conexión coa cidade.

VI. En data 06/11/2025, a Xunta de Goberno Local do Concello de Pontevedra acordaba iniciar o expediente de contratación referido ao contrato vencellado co denominado "*Proxecto unificado de construción das obras do "vial de conexión entre a Avenida de Marín e a rúa Rosalía de Castro" e "Mellora de accesibilidade na avda. Rosalía de Castro. Treito: Manuel del Palacio-Ponte do Ferrocarril ao Porto de Marín"*, cun orzamento total de 3.726.621,23 € (IVE incluído), dos que:



- *Un millón douscentos setenta e nove mil setecentos sesenta e dous euros con trinta e nove céntimos (1.279.762,39€) se corresponden co proxecto denominado "Vial de conexión entre a Avenida de Marín e a Rúa Rosalía de Castro"*

- *Dous millóns catrocentos corenta e seis mil oitocentos cincuenta e oito euros e oitenta e catro céntimos (2.446.858,84) corresponden ao proxecto "Mellora de accesibilidade na Avda. Rosalía de Castro: Treito: Manuel del Palacio-Ponte do Ferrocarril ao Porto de Marín".*

VII. Polo ata aquí indicado e co obxecto facilitar a xestión do proxecto a contratar, Concello e Deputación concordan en asinar un novo convenio de financiamento que abranza a actuación referida ás obras de mellora da accesibilidade do treito da rúa Rosalía de Castro entre Manuel del Palacio-Ponte do Ferrocarril ao Porto de Marín, incluídas no devandito proxecto unificado e directamente relacionadas co novo viario xa conveniado no 2024, e que pauten os acordos de ámbalas institucións para o financiamento do amentado proxecto "Mellora de accesibilidade na Avda. Rosalía de Castro: treito: Manuel del Palacio-Ponte do ferrocarril ao Porto de Marín".

VIII. Que o artigo 25 da Lei 7/1985, de 2 de abril, reguladora das bases do réxime local e, en termos concordantes, o artigo 80 da Lei 5/1997, do 22 de xullo, de Administración Local de Galicia establecen que o municipio, para a xestión dos seus intereses e no ámbito das súas competencias, pode promover actividades e prestar os servizos públicos que contribúan a satisfacer as necesidades e aspiracións da comunidade veciñal, exercendo, en todo caso, nos termos da lexislación do Estado e das Comunidades Autónomas, competencia en materia de infraestrutura viaria e equipamentos de titularidade municipal, en materia de urbanismo, de estacionamento de vehículos e en materia de mobilidade.

IX. Que os convenios entre Administracións Públicas constitúen o instrumento axeitado para desenvolver a súa cooperación en cuestións de interese común, tal como establecen os artigos 47 e seguintes da Lei 40/2015, de 1 de outubro, de réxime xurídico do sector público (LRXSP); o artigo 57 da Lei 7/1985, de 2 de abril, reguladora das bases do réxime local (LRBRL) e 198 e seguintes da Lei 5/1997, de 22 de xullo, de Administración local de Galicia (LALGA); así como no disposto nos artigos 28.1 da Lei 38/2003, de 17 de novembro, xeral de subvencións (LXS), e 26.1 da Lei 9/2007, de 13 de xuño, de subvencións de Galicia (LSG). O presente convenio, pola súa contía, deberá ser remitido ao Tribunal de Contas e ao Consello de Contas.

X. Que a lexislación vixente en materia de réxime local encomenda ás Deputacións a que dirixan a súa actividade a asegurar a prestación integral e adecuada dos servizos de competencia municipal, a tal efecto e co fin de posibilitar a consecución real e efectiva dos mesmos, é polo que instrumenta este convenio dirixido ao cumprimento das obrigas impostas pola normativa vixente.

XI. Que a achega económica da Deputación de Pontevedra ten o carácter dunha subvención, en virtude do disposto no artigo 2 da Lei 38/2003, de 17 de novembro, xeral de subvencións, séndolle de aplicación o réxime xurídico das subvencións. Neste senso, á vista do artigo 22.2 da LXS acredítanse na memoria do expediente razóns de interese público, social e económico suficientes que xustifican a súa concesión, tanto de natureza competencial como pola necesidade de apoiar e complementar a capacidade económica do concello e polo interese veciñal da actuación. Así mesmo, no artigo 28.1 da LXS establécese que a resolución de concesión e, no seu caso, os convenios a través dos cales se canalicen estas subvencións establecerán as condicións e compromisos aplicables de conformidade co disposto nesta lei.



XII. Este convenio tramítase consonte co disposto no artigo 294 LALGA e conforme coa normativa reguladora das subvencións públicas, polo que o convenio non ten carácter contractual, estando excluído do ámbito de aplicación da Lei de contratos do sector público segundo determina o artigo 4 desta norma.

XIII. Que a Deputación Provincial de Pontevedra, nos orzamentos do ano 2026, recolle unha aplicación orzamentaria, no capítulo de transferencias de capital, para convenios co Concello de Pontevedra.

XIV. Que, de acordo coas precedentes consideracións e en desenvolvemento dos principios de colaboración e cooperación, a Deputación de Pontevedra e o concello de Pontevedra establecen como un dos seus obxectivos estratéxicos a actuación coordinada de apoio en materia de equipamentos e infraestruturas de titularidade municipal e acordan aprobar o presente convenio de colaboración, que asinan os aquí comparecentes, con arranxo ás seguintes

CLÁUSULAS

PRIMEIRA.- OBXECTO DO CONVENIO

O obxecto do presente convenio é o de establecer as bases para a colaboración económica e técnica entre a Deputación Provincial de Pontevedra e o Concello de Pontevedra para levar a cabo a execución das obras abrangidas no proxecto de *"mellora de accesibilidade na Avda. Rosalía de Castro. Treito: Manuel del Palacio-Ponte do Ferrocarril ao Porto de Marín"*, deseñado cos obxectivos compartidos de implementar medidas de accesibilidade universal, coonestados cos de calmado de tráfico, mobilidade amábel e sostible e seguranza e calidade medioambiental urbana, baixo a premisa de mellorar o tráfico e a conectividade da entrada oeste da cidade, xunto coa creación de novos espazos para a mobilidade peonil.

SEGUNDA.- IMPORTE E FINANCIAMENTO

O investimento obxecto do presente convenio ascende a cantidade total de DOUS MILLÓNS CATROCENTOS CORENTA E SEIS MIL OITOCENTOS CINCUENTA E OITO EUROS CON OITENTA E CATRO CÉNTIMOS (2.446.858,84€), IVE engadido, que se corresponde co orzamento de execución das obras correspondentes á actuación denominada *"Mellora de accesibilidade na Avda. Rosalía de Castro: Treito: Manuel del Palacio-Ponte do Ferrocarril ao Porto de Marín"* incluída no proxecto unificado aprobado pola Xunta de Goberno Local do Concello de Pontevedra o 06/11/2025, e que será financiado pola Deputación de Pontevedra coa cantidade de CINCOCENTOS OITENTA E TRES MIL CINCOCENTOS CORENTA E OITO EUROS CON VINTE E TRES CÉNTIMOS (583.548,23 €) con cargo ao exercicio 2026, contra a aplicación 2026/942.9420.762.14 e polo Concello de pontevedra coa cantidade de UN MILLÓN OITOCENTOS SESENTA E TRES MIL TRESCENTOS DEZ EUROS CON SESENTA E UN CÉNTIMOS (1.863.310,61 €).

O financiamento necesario para a realización da actuación comprendida neste convenio realizarase da seguinte forma:

	2026	2027
Deputación de Pontevedra (23,85%)	583.548,23 €	



Concello de Pontevedra (76,15%)		1.863.310,61 €
Total actuación	2.446.858,84 €	

A achega provincial consiste nunha contía máxima que ascende ao importe sinalado anteriormente, polo que os posibles incrementos que puidesen producirse no orzamento de execución das obras desta actuación que deriven do procedemento de contratación administrativa ou da execución do contrato, así como das súas posibles modificacións, asumiranse exclusivamente polo Concello de Pontevedra.

No caso de que o investimento realizado teña un custo inferior ao inicialmente previsto e sempre que isto non supoña unha execución deficiente da totalidade da actuación contemplada no proxecto, a contía da subvención reducirase proporcionalmente, manténdose constante a porcentaxe de axuda respecto ao custo total do investimento.

TERCEIRA.- EXECUCIÓN DO CONVENIO

1.- A execución das actuacións e contratos ás que se refire o presente convenio, e o seu financiamento polas partes asinantes, terá lugar durante os anos de vixencia do convenio de acordo coas obrigas de financiamento indicadas na cláusula segunda.

Non obstante, o eventual reaxuste da anualidade da execución do contrato poderá dar lugar ao reaxuste das anualidades do presente convenio, a cuxo efecto o Concello de Pontevedra, previa proposta da Comisión de Seguimento do convenio, dará audiencia á Deputación no expediente que se inicie para o reaxuste da anualidade do devandito contrato e da resolución que se dite.

2.- As obras serán executadas segundo o proxecto técnico, sen prexuízo da posibilidade de que a Deputación realice as inspeccións que considere convenientes e formule as observacións que estime pertinentes e de que corresponda en exclusiva ao órgano de contratación e aos responsables dos respectivos contratos a emisión das ordes e instrucións que procedan.

3.- Formalizado, de selo caso, o contrato, ou contratos, de servizos para a contratación de asistencia técnica á dirección das obras e a Coordinación de Seguridade e Saúde, remitirase copia dos mesmos á Deputación Provincial así como dos abonos a conta que en execución dos mesmos se poidan producir.

4.- O Concello de Pontevedra comunicará á Deputación Provincial a realización de todos os actos públicos de relevancia institucional ou mediática sobre o seguimento da obra, co obxecto de que asista de consideralo procedente un representante da Corporación provincial, en concreto, O Concello deberá comunicarlle á Deputación os actos oficiais relativos ao inicio, execución e finalización do investimento financiado ao abeiro deste convenio. Para estes efectos:

- O Concello comunicarlle á Deputación **coa suficiente antelación, polo menos de catro días**, a data e mais a hora na que terá lugar a comprobación da implantación, á que asistirá, de considerarse procedente, a Presidencia ou unha persoa representante ou facultativa da institución provincial. Así mesmo, a entidade municipal remitiralle á Deputación un exemplar da acta de comprobación da implantación xunto coa fotografía dos carteis de obra que acrediten a



difusión dada ao financiamento outorgado pola Deputación. Os carteis de obra serán colocados no momento da sinatura da devandita acta, axustándose ao disposto no manual de identidade corporativa (<https://www.depo.gal/es/identidade-corporativa>).

- Os facultativos técnicos do Servizo de Cooperación poderán visitar as actuacións en execución. Para isto, e para os efectos de organizar a visita, o Concello comunicaranlle ao citado servizo **coa suficiente antelación, polo menos de catro días**, cando se acade o 50 % e o 100 % de execución do contrato.
- O Concello comunicarlle á Deputación **coa suficiente antelación, polo menos de catro días**, a data e mais a hora nas que terá lugar, ao remate das obras, o acto de recepción destas, ao que asistirá, de consideralo procedente, a Presidencia ou unha persoa representante ou facultativa desta. A Administración municipal remitirlle á provincial un exemplar da acta de recepción e certificación da resolución do órgano competente aprobatoria da recepción da obra executada e da certificación final da mesma.
- De ser o caso, o Concello comunicarlle á Deputación **coa suficiente antelación, polo menos de catro días**, a data e mais a hora nas que se celebre calquera acto público de relevancia institucional ou mediática con motivo do seguimento, difusión, posta en valor ou inauguración da actuación referida, aos que asistirá, de consideralo procedente, a Presidencia ou unha persoa representante da Corporación provincial.

5.- O incumprimento do deber de colocar os carteis de obra ou calquera outra obriga relacionada coa difusión pública e/ou de efectuar as comunicacións relacionadas nos apartados precedentes implicará a imposición de deducións graduadas do modo seguinte:

- O primeiro requirimento implicará unha advertencia.
- O segundo requirimento implicará unha dedución do 5 % da subvención concedida co obxecto de financiar o investimento.
- O terceiro requirimento supoñerá unha dedución do 10 % da subvención concedida para financiar o investimento, que se lle sumará á dedución anterior.
- O cuarto requirimento implicará unha dedución do 15 % da subvención concedida para financiar o investimento, que se acumulará ás anteriores.
- O quinto e sucesivos requirimentos implicarán deducións do 20 % da subvención concedida para financiar o investimento, que se sumarán ás anteriores, e que poderá dar lugar, de ser o caso, á perda total do dereito ao cobro da subvención concedida.

CUARTA.- COMPROMISOS DO CONCELLO DE PONTEVEDRA

O Concello de Pontevedra obrígase a:

- Remitir á Deputación Provincial a documentación técnica pertinente e o correspondente proxecto de obra, asumindo o seu custo, e debendo remitila aprobada á Deputación, así como calquera modificación que se leve a cabo, para a súa posterior supervisión polos técnicos provinciais.



- Remitir, unha vez formalizado, copia do contrato de adxudicación da obra, á Deputación, e comunicar a data e hora en que terá lugar a comprobación de implantación, á que asistirá, de consideralo procedente, un representante da Deputación.
- Licitir, dirixir, executar, controlar e recibir as obras consonte ao correspondente proxecto técnico redactado polo ente provincial.
- Contratar, de selo caso, as asistencias técnicas á dirección de obra e coordinación de seguridade e saúde.
- Obter as correspondentes licenzas e tramitar ante outros organismos as autorizacións pertinentes que fosen precisas.
- Xustificar ante a Deputación o investimento realizado mediante a expedición das correspondentes certificacións de obra aprobadas polo órgano competente do Concello; aboándose para cada certificación que se presente a parte proporcional en relación ao custo total do investimento.
- Comunicar á Deputación **coa suficiente antelación, polo menos de catro días**, a data e mais a hora nas que terá lugar, ao remate das obras, o acto de recepción destas, ao que asistirá, de consideralo procedente, a Presidencia ou unha persoa representante ou facultativa desta.
- Levar a cabo o mantemento e conservación das infraestruturas obxecto deste convenio, tendo que asumir dita responsabilidade desde o día seguinte ao da formalización da acta de recepción das obras, coas obrigas establecidas na normativa patrimonial das administracións públicas.
- Aprobar o texto do convenio pola Xunta de Goberno Local, de conformidade co artigo 127.1.g) da Lei 7/1985, e remitir unha copia do acordo á Deputación.
- Dar a adecuada publicidade a este convenio conforme a cláusula oitava do mesmo, de tal xeito de que quede constancia de que a obra obxecto do mesmo se levou a cabo en colaboración coa Deputación de Pontevedra.
- Compartir coa Deputación de Pontevedra toda a información da que dispoña sobre o avance da obra e sempre antes de facela pública.
- Destinar os fondos percibidos ao obxecto concreto para o que foron concedidos.
- Comunicar á Deputación de forma inmediata, a obtención doutras subvencións ou axudas para a mencionada finalidade procedentes de calquera administración pública ou ente privado nacional ou internacional, con expresión da súa contía.
- Prestar a colaboración e facilitar canta documentación lle sexa requirida no exercicio das funcións de fiscalización e control do destino das axudas que lle corresponden á Intervención Provincial, ao Tribunal de Contas e ao Consello de Contas.
- Asumir o financiamento previsto para o exercicio 2027.

Asemade, o Concello de Pontevedra comprométese ao cumprimento das obrigas contidas na Lei 9/2007, do 13 de xuño, de subvencións de Galicia, e en especial as recollidas no artigo 11 da mesma.



Tamén seralle de aplicación o recollido na Lei 38/2003, de 17 de novembro, xeral de subvencións, e no seu Regulamento, aprobado polo Real decreto 887/2006, de 21 de xullo.

QUINTA.- COMPROMISOS DA DEPUTACIÓN DE PONTEVEDRA

A Deputación obrígase a:

- Financiar os custos derivados do convenio, ata a cantidade disposta na cláusula segunda, que será librada contra a presentación das correspondentes facturas ou documentos análogos acreditativos do gasto efectuado, así como da restante documentación xustificativa necesaria e logo da súa fiscalización pola Intervención provincial.
- Prestar a colaboración e facilitar canta documentación lle sexa requirida no exercicio das funcións de fiscalización e control do destino das axudas que lle corresponden ao Tribunal de Contas e ao Consello de Contas, en cumprimento do disposto no artigo 53 da Lei 40/2015, de Réxime Xurídico do Sector Público, e da Resolución Presidencial núm. 2017008767, de 8 de maio de 2017, tratándose asemade dun convenio cuxas achegas económicas exceden de 600.000,00 €.

SEXTA.- XUSTIFICACIÓN E PAGAMENTO

Segundo o artigo 34.3 da Lei 38/2003 o pago da achega económica regulada neste convenio realizarase mediante transferencia bancaria unha vez que o concello de Pontevedra xustifique axeitadamente a realización do proxecto para o que se concedeu a axuda, nos termos establecidos neste convenio e na normativa reguladora das subvencións públicas.

O tipo de xustificación será o de conta xustificativa con achega de xustificantes de gasto, debendo de presentar a seguinte documentación:

- Facturas rexistradas no punto xeral de entrada de facturas electrónicas da Administración Xeral do Estado (FACE) ou plataforma similar.
- O acordo municipal de aprobación da certificación de obra e da factura correspondente.
- Certificacións de obra executada.

Xunto coa primeira certificación achegarase a seguinte documentación:

- O acordo ou resolución de aprobación do proxecto do investimento.
- O contrato de adxudicación da obra.
- O nomeamento do/a Director/a de obra e coordinador/a de seguridade e saúde.
- Unha copia da acta de comprobación de implantación.
- Unha proba gráfica da difusión dada ao investimento que se financia coa axuda da Deputación.
- Declaración do conxunto de axudas solicitadas, tanto as aprobadas ou concedidas como as pendentes de resolución, para o financiamento do obxecto deste convenio, das distintas administracións públicas competentes ou calquera dos seus organismos, entes ou sociedades.



Xunto coa última certificación ordinaria achegaranse:

- Informe final do/a Director/a de obra.
- Se o informe fin de obra recolle variacións que dean lugar a excesos de medición (liquidacións), este informe acompañarase da certificación final, da correspondente factura e da súa aprobación.
- De producirse a tramitación dun modificado, a certificación expedida pola persoa funcionaria competente de que a súa tramitación foi consonte a Lei de contratos.
- Acta de recepción.
- Proba gráfica da difusión dada ao investimento que se financia coa axuda da Deputación.
- Declaración do conxunto de axudas solicitadas, tanto as aprobadas ou concedidas como as pendentes de resolución, para o financiamento do obxecto deste convenio, das distintas administracións públicas competentes ou calquera dos seus organismos, entes ou sociedades.
- Declaración responsable de non estar o beneficiario incurso en ningunha das causas previstas no artigo 10.2 da LSG, para ser beneficiario desta axuda.
- Calquera outra documentación esixible pola normativa vixente para a correcta xustificación deste convenio ou que se considere necesaria para a comprobación da correcta execución do obxecto do convenio.

A xustificación deberá de presentarse ante a Deputación de Pontevedra no prazo máximo de cinco meses dende o fin da actuación subvencionada. O prazo máximo para presentar a xustificación do investimento será o 31 de maio de 2028.

O concello poderá realizar xustificacións parciais, que responderán ao ritmo de execución do investimento, que se aboarán pola contía equivalente á xustificación presentada. A documentación xustificativa verificarase polos servizos técnicos provinciais e fiscalizarase pola Intervención provincial antes de ser aprobadas e pagadas.

SÉTIMA.- COMPATIBILIDADE CON OUTRAS SUBVENCIONES

Conforme ao disposto no artigo 65.3, letra c) do Regulamento da LXS, aprobado polo Real decreto 887/2006, do 21 de xullo, a achega económica prevista no presente instrumento, que ten carácter de subvención, será compatible con outras subvencións, ingresos ou recursos para a mesma finalidade, procedentes de calquera Administración ou entes públicos ou privados, nacionais, da Unión Europea ou de organismos internacionais.

Porén, o importe da subvención en ningún caso poderá ser de tal contía que, illadamente ou en concorrencia con outras subvencións, axudas, ingresos ou recursos, supere o custo da actuación subvencionada.

OITAVA.- PUBLICIDADE

En toda a documentación e información relativas ao obxecto deste convenio incluírase a imaxe corporativa que a este fin faciliten, en todos os formatos, a Deputación Provincial de Pontevedra e o



Concello de Pontevedra, e nelas figurará de maneira destacada o financiamento da actuación por ambas administracións.

En todo caso, as accións a desenvolver ao abeiro do convenio, deberán garantir un alto impacto e visibilidade da colaboración entre o Concello de Pontevedra e a Deputación Provincial de Pontevedra. O Concello deberá acreditar a publicidade, e indicar as accións de comunicación realizadas. Para isto, o Concello debe:

- Dende o inicio das obras ata a súa total terminación, deberán colocarse os carteis de obra cos logos do mesmo tamaño do Concello de Pontevedra e o da Deputación Provincial de Pontevedra, que se axustarán ao disposto no manual de identidade corporativa (<https://www.depo.gal/es/identidade-corporativa>).
- Facerse cargo, económica e fisicamente, dos carteis da obra que se realicen e da súa retirada tras a finalización do prazo de garantía ou, en todo caso, tras a comprobación material realizada pola Deputación. Por tratarse dunha obra de infraestruturas ou dotacións, os carteis colocaranse ao carón do acceso principal; no caso de obras na infraestructura viaria ou no seu subsolo, situaranse ao comezo da vía ou no seu entroncamento coa vía principal. En todo caso, sen prexuízo do anterior, deberán colocarse nun lugar suficientemente visible.
- Aprobar conxuntamente coa Deputación de Pontevedra o contido de calquera outro cartel ou elemento informativo que conteña a imaxe corporativa ou institucional, independentemente do seu tamaño ou situación. A presenza de carteis ou sinais situados no ámbito da obra que conteñan imaxes ou logotipos institucionais deberá ser equitativa ao 50%, independentemente do seu tamaño ou lugar de colocación.
- Aplicar un criterio proporcional e equivalente á colaboración das entidades participantes en calquera placa ou elemento que se coloque para informar da execución da obra unha vez concluída esta.
- Darlle a adecuada publicidade ao financiamento por parte da Deputación de Pontevedra para as actuacións ou os gastos subvencionados sempre que se refiran a esta actuación, en calquera comparecencia pública, rolda de prensa ou intervención nos medios de comunicación, indicando sempre cal é o importe que achega cada institución e que porcentaxe representan os devanditos importes. Do mesmo xeito, esta información deberá recollerse en todos os comunicados ou notas de prensa que emita o Concello e na respectiva páxina web oficial da do Concello de Pontevedra. A devandita información debe facerse pública de xeito verbal, por escrito ou por medios audiovisuais se fose o caso.
- Asinar de xeito dixital este convenio e, ademais, deberá acompañarse dun acto público de sinatura presencial con convocatoria aos medios de comunicación, garantindo así a necesaria publicidade do acordo. Esta firma presencial correrá a cargo dos máximos dirixentes de ambas institucións -alcalde e presidente provincial-, que estarán acompañados dunha persoa representante do Concello de Pontevedra escollida libremente polo propio Concello e dunha persoa representante da Deputación Provincial de Pontevedra escollida libremente pola Deputación Provincial de Pontevedra.
- Facer constar en todas as accións de comunicación ou publicidade (carteis, folletos, programas, placas, cartas ou páxina web, entre outras) o apoio da Deputación. Isto farase mediante a inclusión da imaxe corporativa actualizada nun lugar visible.



Correspóndelle ao Servizo de Comunicación Institucional da Deputación dar as instrucións que se deben seguir no relativo á identidade corporativa provincial (<https://www.depo.gal/es/identidade-corporativa>).

En todo caso, a publicidade da colaboración entre a Deputación Provincial e o Concello de Pontevedra deberá realizarse conforme ao manual de identidade corporativa que se atope vixente e publicado na páxina web da Deputación no momento da aprobación do convenio, de tal forma que sirva como documento de referencia á hora de poñer en práctica todas as accións de publicidade e difusión que resultan obrigatorias conforme o actual marco normativo.

O incumprimento do deber de darlle publicidade á subvención concedida, tanto no relativo á colocación dos carteis de obra no momento da sinatura da acta de comprobación de implantación como a calquera outra obriga relacionada coa difusión pública, dará lugar á imposición das deducións que se establecen no pacto TERCEIRO e, no seu caso, á perda do dereito ao cobro da subvención concedida.

Por outra parte, en cumprimento do establecido na resolución de 15 de xuño de 2020, da Intervención Xeral da Administración do Estado, pola que se regula o proceso de rexistro e publicación de convocatorias no Sistema Nacional de Publicidade de Subvencións e Axudas Públicas e, en aplicación dos principios recollidos na Lei 19/2013, de 9 de decembro, de transparencia, acceso á información pública e bo goberno, a Base de Datos Nacional de Subvencións operará como sistema nacional de publicidade das subvencións. A tales efectos e para garantir o dereito dos cidadáns a coñecer todas as subvencións convocadas en cada momento de cara a contribuír aos principios de publicidade e transparencia, a Intervención Xeral da Administración do Estado publicará na súa páxina web as subvencións concedidas, segundo o establecido nos artigos 20.4 e 20.8.b da Lei 38/2003, de 17 de novembro, xeral de subvencións.

A falta de previsións concretas, rexerán con carácter supletorio as regras das bases reguladoras do Plan de Obras e Servizos de competencia municipal 2026-2027 (Plan + Provincia 2026-2027), especificamente as previstas para a Liña 1 de investimentos, por ser o Plan de natureza equivalente a este convenio.

NOVENA.- CONFIDENCIALIDADE E PROTECCIÓN DE DATOS

As partes comprométense ao intercambio de datos e información técnica para o cumprimento efectivo de todos os termos deste convenio coas garantías de confidencialidade que en cada caso se requiran e permanecerá exclusivamente no ámbito da relación das partes e do persoal técnico que colabore nas actividades, obrigándose a mantelo en réxime de confidencialidade por prazo indefinido e con independencia da duración do convenio.

Toda a información e documentación intercambiada no marco do convenio será propiedade das respectivas partes.

As actuacións obxecto deste convenio que impliquen o tratamento de datos de carácter persoal deberán respectar na súa integridade a normativa reguladora de protección de datos de carácter persoal.



DÉCIMA. - COMISIÓN DE SEGUIMIENTO

Para o seguimento e coordinación da execución deste convenio e resolución das dúbidas que poidan producirse na súa interpretación crearase unha comisión integrada por dous representantes de cada unha das Administracións asinantes, un dos cales terá carácter técnico.

As súas funcións, entre outras, serán as seguintes:

- A puntual recepción de información sobre tódalas actuacións que se produzan na execución dos contratos a que este convenio se refire.
- Impulsar e avaliar o cumprimento deste convenio propoñendo as actuacións que se consideren precisas.
- Propoñer a interpretación, no caso de dúbida, do seu contido.
- Se xorden controversias na aplicación do convenio, propoñerlles ás partes a súa resolución.
- A resolución das dúbidas que presente a interpretación do convenio e, no seu caso, a emisión de informe se a dúbida ten que ser resolta polos órganos de goberno das administracións asinantes.

A comisión reunirase cando o estime conveniente o seu responsable, por decisión propia ou a petición de calquera dos seus membros.

As súas reunións terán lugar no Pazo Provincial da Deputación ou na Casa do Concello de Pontevedra. Na reunión constituínte da Comisión de Seguimento designarase ao/a seu/súa responsable e ao/á seu/súa secretario/a que levantará acta das súas reunións.

DÉCIMO PRIMEIRA. - VIXENCIA

O investimento obxecto deste convenio deberá estar executado e finalizado na data límite do 31 de decembro de 2027, fixándose un prazo de xustificación ata o 31 de maio de 2028.

No caso de imposibilidade de remate das obras ou xustificación nos prazos referidos, as partes poderán acordar a ampliación dos mesmos ata o 31 de decembro de 2028.

No caso de que, por motivos xustificadas, ou como consecuencia do axuste das anualidades de execución do contrato, as obras obxecto do presente convenio non estivesen rematadas nesa data, poderase estender a súa vixencia, previa emisión do informe da Comisión de Seguimento no que deberá especificar o prazo de prórroga.

No caso de que o Concello non xustifique o gasto realizado en prazo ou execute o investimento subvencionado mais aló do prazo de execución establecido, iniciárase o procedemento de perda do dereito ao cobro, non podendo utilizarse o crédito sobrance para conceder outra subvención ao Concello.

DÉCIMO SEGUNDA. - EXTINCIÓN E CAUSAS DE RESOLUCIÓN

De acordo co previsto no artigo 51 da Lei 40/2015, o convenio extinguirase polo cumprimento das actuacións que constitúen o seu obxecto ou por incorrer en causa de resolución.

Serán causas de resolución:



- O transcurso do prazo máximo de vixencia do convenio.
- O acordo unánime dos asinantes.
- O incumprimento das obrigas e compromisos asumidos por parte dalgún dos asinantes.

Neste caso, notificarase á parte incumpridora un requirimento para que, no prazo que se sinale, cumpra coas obrigas ou compromisos que se consideran incumpridos. Este requirimento será comunicado tamén ao responsable da Comisión de Seguimento. Se transcorrido o prazo indicado no requirimento persistira o incumprimento, a parte que o dirixiu notificará á outra parte a concorrencia de causa de resolución e entenderase resolto o convenio. A resolución do convenio por esta causa poderá dar lugar a indemnización dos danos e perdas causados.

- Por decisión xudicial declaratoria da nulidade do convenio.
- Por calquera outra causa distinta das anteriores prevista no convenio ou noutras leis.

DÉCIMO TERCEIRA.- RÉXIME XURÍDICO E XURISDICIÓN COMPETENTE

O presente convenio ten natureza administrativa e rexerase pola Lei 38/2003, de 17 de novembro, xeral de subvencións, e o Real decreto 887/2006, de 21 de xuño, polo que se aprobou o seu regulamento, nos seus preceptos básicos; a lexislación básica do Estado en materia de réxime local; a Lei 9/2007, de 13 de xuño, de subvencións de Galicia; os preceptos non básicos da Lei 38/2003 e do Real decreto 887/2006; polos pactos que se conteñen neste convenio; polas Bases de execución dos orzamentos das Administracións asinantes; a Ordenanza xeral de subvencións da Deputación Provincial e polas restantes normas de dereito administrativo, e no seu defecto, as normas de dereito privado.

Así mesmo, a falta de entendemento previo pola Comisión de Seguimento, as partes quedan sometidas á xurisdición contencioso-administrativa na resolución de posibles controversias que puideran suscitar o incumprimento ou a interpretación do convenio.

E en proba de canto antecede, as partes que interveñen asinan o presente convenio na data da sinatura electrónica.

O alcalde-presidente do Concello de Pontevedra, Miguel Anxo Fernández Lores

O secretario do Concello de Pontevedra, José Carlos Castiñeira Piñeiro

O presidente da Deputación Provincial de Pontevedra, Luís López Diéguez

A vicesecretaria da Deputación Provincial de Pontevedra, María Beatriz del Cerro del Río"

A sinatura do convenio queda condicionada á aprobación do texto do convenio polo órgano competente do Concello de Pontevedra.

- FACULTAR ao presidente para formalizar o citado convenio mediante a súa sinatura.
- DAR TRASLADO do presente acordo ao Concello de Pontevedra, á Intervención, ao Servizo de Cooperación, ao Gabinete da Presidencia e ao Gabinete de Prensa. "



Sometido a votación este asunto, a Comisión Informativa de Cooperación Local, Transfronteiriza e de Coordinación das Emerxencias Provinciais, ditamina favorablemente por unanimidade, cos votos a favor dos/as deputados/as do Grupo Provincial do PP (9), do Grupo Provincial do PSdeG-PSOE (6) e do Grupo Provincial do BNG (2)

3. Ditaminar a aprobación do proxecto técnico reformulado da actuación “Proxecto básico e de execución unificado para mellora da accesibilidade en Rosalía de Castro e Bueixos. Concello da Cañiza” presentado polo concello da Caniza ao abeiro do Plan Provincia Extraordinaria 2025 (Plan Extra 2025) e a modificación do acordo do pleno núm. 5.8616, de 27/03/2026, de concesión de subvención (Expte. 2025072582)

Sométese ao ditame da Comisión Informativa de Cooperación Local, Transfronteiriza e de Coordinación das Emerxencias Provinciais a seguinte proposta de acordo, de conformidade co establecido nos artigos 123 a 126 do Real Decreto 2568/1986, do 28 de novembro, polo que se aproba o Regulamento de organización, funcionamento e réxime xurídico das entidades locais, con carácter previo á súa elevación ante o Pleno para a súa aprobación:

“ASUNTO: APROBACIÓN DO PROXECTO TÉCNICO REFORMULADO DA ACTUACIÓN “PROXECTO BÁSICO E DE EXECUCIÓN UNIFICADO PARA MELLORA DA ACCESIBILIDADE EN ROSALÍA DE CASTRO E BUEIXOS. CONCELLO DA CAÑIZA” PRESENTADO POLO CONCELLO DA CANIZA AO ABEIRO DO PLAN PROVINCIA EXTRAORDINARIA 2025 (PLAN EXTRA 2025) E A MODIFICACIÓN DO ACORDO DO PLENO NÚM. 5.8616, DE 27/03/2026, DE CONCESIÓN DE SUBVENCIÓN (Expte. 2025072582)

ANTECEDENTES

- O Pleno da Corporación Provincial na súa sesión extraordinaria de 30/09/2025, mediante o acordo núm. 4.8493, aprobou as Bases reguladoras e convocatoria do Plan Provincia Extraordinaria 2025 (Plan Extra 2025), publicadas no Boletín Oficial da Provincia de Pontevedra (BOPPO) núm. 189, de 03/10/2025. Así mesmo, para axustar a base quinta ao novo financiamento do Plan, procedeuse a modificar as bases reguladoras mediante o acordo plenario núm. 4.8615, adoptado na sesión ordinaria de 27 de marzo de 2026, publicado no BOPPO núm. 60, do 30 de marzo de 2026.
- O Pleno da Corporación Provincial, na súa sesión ordinaria de 27/03/2026, mediante o acordo núm. 5.8616, concedeu unha subvención polo procedemento de concorrència competitiva ao Concello da Caniza, con destino á execución da actuación denominada “Proxecto básico e de execución unificado para mellora da accesibilidade en Rosalía de Castro e Bueixos. Concello da Cañiza”, ao abeiro do Plan Provincia Extraordinaria 2025 (Plan Extra 2025).
O custo total da actuación ascendía a 852.944,31€ e a subvención concedida foi de 682.000,00€, completándose o financiamento mediante unha achega municipal por importe de 170.944,31€.
- Nas datas 08/04/2026, 09/04/2026, 15/04/2026 e 23/04/2026 o Concello da Caniza presenta no



registro da Deputación (núms. Registro WEB2026029925, WEB2026029930, WEB2026029933 e WEB2026032750 e WEB2026035482) un proxecto reformulado do proxecto inicial, un decreto de solicitude de aprobación da reformulación e compromiso de financiamento, un informe xustificativo das causas que motivan a reformulación do proxecto, a autorización sectorial do Servizo de Infraestruturas da Deputación de Pontevedra para o proxecto inicial, a aprobación do proxecto técnico reformulado por parte do órgano competente do Concello, e un informe do servizo de Infraestruturas da Deputación de Pontevedra no que se resolve que non é necesario volver a solicitar a autorización como consecuencia das modificacións introducidas no proxecto.

As variacións entre ambos proxectos débense a correccións dos prezos de proxecto para unha mellor adaptación ós prezos de mercado. Os cambios introducidos aumentan o orzamento en 188.835,17 € (un incremento do 22,14%, correspondente á execución da obra) ata o importe de 1.041.779,48 €, manténdose invariable o importe da subvención concedida e aumentando a achega do Concello ata a cantidade de 359.779,48€.

- O enxeñeiro do Servizo de Cooperación emite informe de supervisión do proxecto o 27/04/2026 (CSV: M6VTD6g4E8WQYoGY).
- Examinado o proxecto pola Comisión de persoas expertas do Plan Provincia Extraordinaria 2025 (Plan Extra 2025) na data 29/04/2026 conclúese que se pode continuar coa tramitación do expediente, tendo en conta que os cambios introducidos non supoñen unha minoración da puntuación acadada no proxecto inicialmente presentado, e que se mantén a puntuación obtida na baremación de acordo aos criterios de valoración fixados nas bases da convocatoria.
- O 29/04/2026 o xefe do Servizo de Cooperación informa favorablemente o expediente (CSV: V1WXDB5RGW1TYZIJ).
- Na data 18/05/2026 o enxeñeiro de camiños, canais e portos adscrito a Intervención emite informe no que fai constar que este plan recibiu financiación para todos os proxectos presentados que cumprían as esixencias das bases reguladoras, polo que calquera eventual reformulación ou modificación non ten influencia nin supón prexuízos a terceiros no que respecta ás puntuacións técnicas que rexeron a concorrência competitiva, posto que incluso unha redución das mesmas tería nula afección na concesión da financiación, sen prexuízo doutras implicacións administrativas que os cambios puidesen producir. (CSV: J8W1ZVC4147ASWAK).
- Na data 18/05/2026 a Intervención provincial emite informe de fiscalización favorable á proposta de modificación do acordo de concesión por cambio de proxecto do investimento obxecto de subvención (CSV: OW3CX12TXJ349ACG).
- Sométese, así mesmo, ao ditame da Comisión Informativa de Cooperación Local, Transfronteiriza e de Coordinación das Emerxencias Provinciais.

FUNDAMENTOS DE DEREITO

Réxime xurídico

- Lei 38/2003, de 17 de novembro, xeral de subvencións (LXS), e o seu Regulamento aprobado por Real Decreto 887/2006, de 21 de xullo (RLXS)
- Lei 9/2007, de 13 de xuño, de subvencións de Galicia (LSG), e o seu Regulamento aprobado por Decreto 11/2009, de 8 de xaneiro (RLSG)



- Lei 7/1985, de 2 de abril, reguladora das bases do réxime local (LRBRL)
- Lei 39/2015, de 1 de outubro, do procedemento administrativo común das administracións públicas (LPACAP)
- Lei 40/2015, de 1 de outubro, de réxime xurídico do sector público (LRXSP)
- Real Decreto 2568/1986, de 28 de novembro, polo que se aproba o Regulamento de organización, funcionamento e réxime xurídico das entidades locais (ROFRXEL)
- Real Decreto Legislativo 2/2004, de 5 de marzo, polo que se aproba o Texto refundido da Lei reguladora das facendas locais (TRLRFL)
- Lei 9/2017, de 8 de novembro, de contratos do sector público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, de 26 de febreiro de 2014 (LCSP)
- Ordenanza xeral de subvencións da Deputación de Pontevedra (OXSDPPO)
- Bases de execución do orzamento da Deputación
- Bases reguladoras e convocatoria do Plan Provincia Extraordinaria 2025 (Plan Extra 2025).

Consideracións xurídicas

Instrución do expediente

- Base reguladora 7ª da convocatoria, pola que a instrución do procedemento correspóndelle ao xefe do Servizo de Cooperación.

Petición e evacuación de informes

- Artigos 79 e 80 da LPACAP, sobre a petición e a evacuación de informes.
- Artigo 88.6 da LPACAP, que sinala que a aceptación de informes ou ditames servirá de motivación á resolución cando se incorporen ao texto da mesma.
- Artigos 213 e ss. do TRLRFL, sobre o control e a fiscalización da xestión económica que lle corresponde realizar á Intervención.
- Bases 47ª e 48ª de execución do vixente orzamento provincial, sobre o control e a fiscalización da xestión económica, que sinala a competencia da Intervención para realizar esta función.

Resolución do expediente

- Artigo 2 da LSG, en concordancia co artigo 2 da LXS, que na definición de subvención vincula a disposición dineraria entre outros requisitos, a que a entrega estea suxeita ao cumprimento dun determinado obxectivo, a execución dun proxecto, a realización dunha actividade, ou a adopción dun comportamento singular, xa realizados ou por desenvolver, debendo o beneficiario cumprir as obrigacións materiais e formais que se estableceran.
- Artigo 11.a) da LSG, en concordancia co artigo 14.1.a) da LXS, que establece como obriga do beneficiario cumprir o obxectivo ou executar o proxecto que fundamenta a concesión da subvención.
- Artigo 64 do RLXS que dispón que unha vez recaído un acordo ou resolución de concesión pódese solicitar unha modificación do seu contido, de acordo co disposto nas bases reguladoras da



subvención, e sempre e cando non se prexudique dereitos de terceiros e se solicite antes de que conclúa o prazo para a realización da actividade.

- Artigo 16 da OXSDPPO, respecto da modificación da resolución de concesión, pola que salvo que nas bases reguladoras, resolución de aprobación da convocatoria ou de concesión se estableza o contrario, o beneficiario poderá solicitar a súa modificación, non debendo variarse o destino ou finalidade da subvención. En concorrencia competitiva a modificación só será posible no caso de que non altere a puntuación obtida pola persoa beneficiaria por aplicación dos criterios de concesión.
- Artigo 205 da LCSP, que recolle os supostos de modificacións non previstas nos pregos de cláusulas administrativas, así como os límites na alteración das súas contías.
- Artigo 242.4 da LCSP, polo que de considerarse necesaria unha modificación do proxecto procederase á súa redacción e aprobación polo órgano de contratación.
- Base reguladora 18ª da convocatoria, segundo a cal, se tras a concesión da subvención e antes da licitación do investimento xurdise a necesidade de reformular o proxecto, o concello deberá redactar e xestionar administrativamente a reformulación, que deberá ser aprobada polo órgano competente da entidade municipal. A reformulación do proxecto técnico non poderá variar a tipoloxía inicialmente aprobada nin supoñer unha minoración da puntuación acadada polo proxecto inicial. Despois da aprobación polo concello, a Deputación supervisará o proxecto reformulado e dará a súa aprobación, sen a cal non será posible o pago da subvención. En todo caso, o concello deberá xustificar as causas que motivan a reformulación do proxecto (cumprimento de condicionamentos impostos polas autorización sectoriais, necesidade de adaptar, redefinir algún concepto... etc). A reformulación do proxecto técnico non dará lugar a un incremento da contía subvencionada. No suposto de que a reformulación supoña un incremento do custe do investimento, o concello poderá financiar este incremento con: fondos propios do Concello; achegas concedidas pola Deputación con cargo a outros plans ou programas de subvencións, sempre que os prazos de execución se axusten aos recollidos nas presentes bases, e achegas outorgadas por outras Administracións Públicas con cargo a convenios ou a plans ou programas de axudas, sempre que os prazos de execución se axusten aos recollidos nas presentes bases. Se a reformulación do proxecto técnico supón unha minoración do custe do investimento, a minoración reverterá na achega municipal sen variar a subvención concedida pola Deputación, sempre que se manteña a porcentaxe de financiamento mínimo por parte do concello establecida na base quinta destas bases. O custe da redacción do proxecto reformulado correrá a cargo do Concello.

Competencia para resolver

- Correspóndelle ao Pleno da Deputación, de acordo coa Base 16ª de execución dos orzamentos da Deputación para o vixente exercicio, e en virtude dos artigos 33 da LRBRL e 185 do TRLRFL.

CONCLUSIÓN

O proxecto reformulado presentado polo Concello da Caniza para a execución da actuación denominada "Proxecto básico e de execución unificado para mellora da accesibilidade en Rosalía de Castro e Bueixos. Concello da Cañiza", no marco do Plan Provincia Extraordinaria 2025 (Plan Extra



2025), non altera nin a finalidade nin o obxecto para o que se outorgou a axuda económica da Deputación.

Os cambios introducidos aumentan o orzamento en 188.835,17 € (un incremento do 22,14%, correspondente á execución da obra) ata o importe de 1.041.779,48 €, manténdose invariable o importe da subvención concedida e aumentando a achega do Concello ata a cantidade de 359.779,48€.

A Comisión de Persoas Expertas do Plan Provincia Extraordinaria 2025 (Plan Extra 2025) informa favorablemente a supervisión do proxecto reformulado, poñendo de manifesto que os cambios introducidos non afectan aos criterios de valoración e a puntuación en base aos que se concedeu a axuda.

O proxecto preséntase antes de que remate o prazo de execución das obras acollidas no Plan Provincia Extraordinaria 2025 (Plan Extra 2025) e co mesmo non se prexudican intereses de terceiros, nin se alteran as circunstancias que se tiveron en conta para a concesión da subvención. En consecuencia, non se prexudican os principios de igualdade, obxectividade e non discriminación que deben rexer os procedementos de concesión de subvencións, e en particular no sistema de concorrencia competitiva.

Por todo o exposto, e á vista dos antecedentes, fundamentos de dereito e conclusións sinaladas, sométese ao ditame da Comisión Informativa de Cooperación Local, Transfronteiriza e de Coordinación das Emerxencias Provinciais a seguinte PROPOSTA DE ACORDO:

- APROBAR o proxecto técnico reformulado da actuación denominada “Proxecto básico e de execución unificado para mellora da accesibilidade en Rosalía de Castro e Bueixos. Concello da Cañiza”, presentado polo Concello da Caniza, ao abeiro do Plan Provincia Extraordinaria 2025 (Plan Extra 2025).
- MODIFICAR o acordo plenario núm. 5.8616, do 27/03/2026, de concesión de subvención ao Concello da Caniza para reaxustar o financiamento de conformidade coa seguinte táboa:

ORZAMENTO	SUBVENCIÓN PLAN EXTRA	ACHEGA CONCELLO
1.041.779,48 €	682.000,00 €	359.779,48€

- DAR TRASLADO do presente acordo ao Concello da Caniza, a Intervención, ao Servizo de Cooperación e ao Gabinete de Presidencia.

Sometido a votación este asunto, a Comisión Informativa de Cooperación Local, Transfronteiriza e de Coordinación das Emerxencias Provinciais, ditamina favorablemente por unanimidade, cos votos a favor dos/as deputados/as do Grupo Provincial do PP (9), do Grupo Provincial do PSdeG-PSOE (6) e do Grupo Provincial do BNG (2).



4. Ditaminar a desestimación do recurso de reposición interposto polo Concello de Cambados contra a súa exclusión da concesión de subvención do Plan Provincia Extraordinaria 2025 (Plan Extra 2025) (Expediente 2025073661)

Sométese ao ditame da Comisión Informativa de Cooperación Local, Transfronteiriza e de Coordinación das Emerxencias Provinciais a seguinte proposta de desestimación do recurso de reposición interposto polo Concello de Cambados contra a súa exclusión da concesión de subvención do Plan Extra 2025, de conformidade co establecido nos artigos 123 a 126 do R.D. 2568/1986, do 28 de novembro, polo que se aproba o Regulamento de organización, funcionamento e réxime xurídico das Entidades Locais, con carácter previo á súa elevación ante o Pleno para a súa aprobación:

"PROPOSTA DE ACORDO

ASUNTO: DESESTIMACIÓN DO RECURSO DE REPOSICIÓN INTERPOSTO POLO CONCELLO DE CAMBADOS CONTRA A SÚA EXCLUSIÓN DA CONCESIÓN DE SUBVENCIÓN DO PLAN PROVINCIA EXTRAORDINARIA 2025 (PLAN EXTRA 2025) – Expediente 2025073661

I. ANTECEDENTES

PRIMEIRO. A Deputación Provincial de Pontevedra aprobou as Bases Reguladoras e Convocatoria do Plan Provincia Extraordinaria 2025 (Plan Extra 2025) mediante o acordo plenario núm. 4.8493, adoptado na sesión extraordinaria de 30 de setembro de 2025, publicadas no BOPPO núm. 189, do 03 de outubro de 2025, co obxecto de financiar actuacións estratéxicas para os concellos de menos de 50.000 habitantes da Provincia de Pontevedra.

O prazo de presentación de solicitudes é dun mes, contado a partir do día seguinte ao da publicación da convocatoria e dos seu extracto no BOPPO e na Base de Datos Nacional de Subvencións (BDNS), é dicir, remata o 4 de novembro de 2026.

SEGUNDO. O día 31 de outubro de 2025, mediante o rexistro número WEB2025075654, o Concello de Cambados solicita participar na convocatoria do Plan Provincia Extraordinaria 2025 (Plan Extra 2025) achegando un proxecto para unha actuación denominada "Acondicionamento de entorno para zonas de xogo activo, seguro ó aire libre e práctica de actividades físicas funcionais con zona de lecer, skate park con bowl e zona de parkour e calistenia no Pombal", e cuxo orzamento ascende a 429.989,15 €.

En dito proxecto xustifícase expresamente a innecesariedade de realizar un estudo xeolóxico e xeotécnico, en base á experiencia previa contrastada e ás características acreditadas do terreo, recoñecidas no plan especial de reforma interior que desenvolve a unidade de xestión 1, O Pombal.

TERCEIRO. Na data 08 de xaneiro de 2026 emítense requirimentos de emenda da documentación da solicitude presentada polos Concellos. No caso de Cambados, non se emite requirimento porque



finalizado o prazo de presentación de solicitudes achégase un proxecto completo e válido, que non é necesario emendar, non obstante o importe do orzamento non acada o importe mínimo esixido nas bases, polo que ó ser este un requisito esencial en consecuencia, non se considera un proxecto subvencionable, sendo unha causa de exclusión, de acordo coa base 6ª das reguladoras e convocatoria do Plan.

CUARTO. O día 04 de febreiro de 2026, mediante a Resolución Presidencial número 2026000887, noméase aos membros que forman parte da Comisión de Persoas Expertas do Plan Provincia Extraordinaria 2025 (Plan Extra 2025), de acordo co previsto na base sexta das reguladoras do procedemento.

QUINTO. A Comisión de Persoas Expertas do Plan Provincia Extraordinaria 2025 (Plan Extra 2025), reunida en tres sesións os días 09 e 16 de febreiro e o 10 de marzo de 2026, e unha vez finalizada a revisión dos proxectos e demais documentación técnica correspondente ás 57 solicitudes admitidas, elabora unha relación coa puntuación acadada por cada Concello de modo decrecente.

SEXTO. Convócase a Comisión informativa de Cooperación Local, Transfronteiriza, e de Coordinación das Emerxencias Provinciais o día 17 de marzo de 2026, facéndose público en diversos medios de comunicación, que informaron sobre a desestimación das solicitudes de dous Concellos, entre os que se atopa Cambados.

SÉTIMO. O día 18 de marzo de 2026 (número rexistro WEB2026021449), catro meses e medio despois de finalizado o prazo de presentación de solicitudes, o Concello de Cambados presenta no rexistro da Deputación un informe do arquitecto municipal advertindo que proximamente achegarán o proxecto corrixido para incrementar algunhas partidas en previsión de que nun futuro se realice un estudo xeolóxico e xeotécnico (non se achega o dito estudo porque tal e como expoñen aínda non se realizou), cuxas implicacións económicas son duplicar o tempo de man de obra e maquinaria, así como o cambio dunha pala, por outra máis custosa, na partida 2.1 do proxecto.

OITAVO. O día 20 de marzo de 2026 ten lugar a sesión ordinaria da Comisión informativa de Cooperación Local, Transfronteiriza, e de Coordinación das Emerxencias Provinciais, a cal ditamina favorablemente a proposta de concesión de subvencións ao abeiro do Plan Provincia Extraordinaria 2025 (Plan Extra 2025), na que se relacionan as solicitudes desestimadas e a súa motivación.

NOVENO. O Concello de Cambados presentou no Rexistro da Deputación, con data 24 de marzo de 2026, documentación complementaria relativa á solicitude de subvención, coa finalidade de corrixila e adaptala a un novo proxecto (número rexistro WEB2026022850). Con data 25 de marzo de 2026, o Concello presenta un oficio de remisión do novo proxecto mediante USB. O novo proxecto ten un orzamento superior de 455.381,25 €.

DÉCIMO. O Pleno da Deputación Provincial, mediante o acordo número 4.8615, adoptado na sesión ordinaria do día 27 de marzo de 2026, acordou aprobar a modificación das bases reguladoras e convocatoria do Plan Provincia Extraordinaria 2025 (Plan Extra 2025) para axustar a base 5ª ao novo financiamento.



DÉCIMO PRIMEIRO. O Pleno da Deputación Provincial, mediante o acordo número 5.8616, adoptado na sesión ordinaria do 27 de marzo de 2026, desestimou, motivadamente, a concesión da subvención, polo procedemento de concorrncia competitiva, ao Concello de Cambados, con destino ao financiamento do investimento denominado “Acondicionamento de entorno para zonas de xogo activo, seguro ó aire libre e práctica de actividades físicas funcionais con zona de lecer, skate park con bowl e zona de parkour e calistenia no Pombal” ao abeiro do Plan Provincia Extraordinaria 2025 (Plan Extra 2025), xa que o orzamento de licitación do proxecto presentado non acada o importe mínimo recollido na base 5ª. Dito acordo foi notificado ao Concello o día 01 de abril de 2026 (código notificación: NOT2026007503), e foi recibida por parte do destinatario ese mesmo día (identificador DEHÚ: 534320169cceb94a65do). A motivación da desestimación que consta no acordo transcríbese a continuación:

“Motivo: NON ACADAR O ORZAMENTO DE LICITACIÓN O MÍNIMO ESTABLECIDO NA BASE 5ª

Orzamento total ascende a 429.989,15 €.

Explicación: Este importe non acada o mínimo establecido na base 5ª, xa que no caso deste Concello, ao contar cunha poboación comprendida entre 10.001 e 20.000 habitantes, o importe mínimo do orzamento estaría situado nos 450.000 € (o 50% da subvención máxima para este tramo de poboación), polo que procede a súa exclusión automática, de acordo co establecido na base 11ª.”

DÉCIMO SEGUNDO. Con data 04 de maio de 2026, o Concello de Cambados presenta no Rexistro da Deputación (número Rexistro WEB2026038527) un recurso potestativo de reposición contra o acordo plenario 5.8616 de data 27 de marzo de 2026, polo que desestima a concesión dunha subvención ao Concello, ao abeiro do Plan Provincia Extraordinaria 2025 (Plan Extra 2025).

II. FUNDAMENTOS DE DEREITO

Réxime xurídico

- Lei 38/2003, de 17 de novembro, xeral de subvencións (LXS), e o seu Regulamento, aprobado por Real Decreto 887/2006, de 21 de xullo (RLXS)
- Lei 7/1985, de 2 de abril, reguladora das bases do réxime local (LRBRL)
- Lei 5/1997, de 22 de xullo, reguladora da Administración Local de Galicia (LALGA)
- Lei 39/2015, de 1 de outubro, do procedemento administrativo común das Administracións Públicas (LPACAP)
- Lei 40/2015, de 1 de outubro, de réxime xurídico do sector público (LRXSP)
- Lei 9/2007, de 13 de xuño, de subvencións de Galicia (LSG)
- Lei 19/2013, de 9 de decembro, de transparencia, acceso á información pública e bo goberno
- Real Decreto 2568/1986, de 28 de novembro, polo que se aproba o Regulamento de Organización, Funcionamento e Réxime Xurídico das Entidades Locais (ROFRXEL)



- Lei 9/2017, de 8 de novembro, de contratos do sector público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, de 26 de febreiro de 2014
- Bases reguladoras e convocatoria do Plan Provincia Extraordinaria 2025 (Plan Extra 2025)
- Ordenanza xeral de subvencións da Deputación de Pontevedra
- Bases de execución do orzamento da Deputación para o vixente exercicio.

Consideracións xurídicas

PRIMEIRO. Prazos

O artigo 124.1 da Lei 39/2015, de 1 de outubro, do procedemento administrativo común das administracións públicas (LPACAP), establece que *"o prazo para a interposición do recurso de reposición será dun mes, se o acto fóra expreso. Transcorrido o dito prazo, unicamente poderá interpoñerse recurso contencioso-administrativo, sen prexuízo, no seu caso, da procedencia do recurso extraordinario de revisión.*

Se o acto non fóra expreso, o solicitante e outros posibles interesados poderán interpoñer recurso de reposición en calquera momento a partir do día seguinte a aquel en que, de acordo coa súa normativa específica, se produza o acto presunto".

No presente caso, e dado que se trata dun acto expreso que pon fin á vía administrativa, si cabe a posibilidade de presentar recurso de reposición, o cal se presenta en prazo, xa que a aceptación da notificación se produce en data 01 de abril de 2026 e o recurso se presentou en data 04 de maio de 2026.

SEGUNDO. Obxecto

O artigo 112 da LPACAP esixe que o recurso se fundamente en calquera dos motivos de nulidade ou anulabilidade previstos nos artigos 47 e 48 do referido texto normativo.

O Concello de Cambados invoca vicio de anulabilidade por ter vulnerado a base 11ª das reguladoras e convocatoria do procedemento, así como os artigos 68 e 88 da LPACAP. Polo tanto, solicita a anulación do acordo 5.8616 do Pleno da Deputación Provincial da data 27 de marzo de 2026, polo que se desestima a concesión da subvención, e insta á súa corrección, ou, subsidiariamente, ordenar a retroacción do procedemento.

TERCEIRO. Sobre o incumprimento dun requisito esencial: importe mínimo necesario do orzamento do investimento para acadar a subvencionabilidade

No momento de solicitar a subvención, o Concello presenta no Rexistro da Deputación un certificado do decreto da Alcaldía 2025-1815, de data 30/10/2025, polo que se aproba o proxecto técnico da actuación "Reformado 2 do PBE para acondicionamento de entorno para zonas de xogo activo seguro



ó aire libre e práctica de actividades físicas funcionais con zona de lecer, skate park con bowl e zona de parkour e calistenia no Pombal”, redactado pola arquitecta Dona Paula Alfonso Laya e asinado con data 29/10/2025. Así mesmo, solicítase unha subvención por importe de 322.491,86 € para un proxecto cuxo orzamento base de licitación ascende aos 429.989,15 €.

Por tanto, compróbase con total obxectividade que o orzamento do proxecto presentado non concorda cos requisitos básicos expresados nas bases reguladoras do procedemento, xa que a base quinta é clara no tocante ás contías máximas e mínimas de cofinanciación, así como no referente ao importe mínimo do orzamento, que ten que ser un 50% da cantidade máxima a subvencionar en cada tramo de poboación.

No caso do Concello de Cambados, ao contar cunha poboación comprendida entre os 10.001 e 20.000 habitantes, o límite mínimo serían 450.000 €, dado que o importe máximo da subvención para os Concellos situados neste tramo sitúase nos 900.000 €.

O proxecto achegado polo concello de Cambados é un proxecto completo é válido, pero que non é subvencionable nesta convocatoria por non cumprir no momento en que finaliza o prazo de presentación de solicitudes un requisito de carácter esencial.

CUARTO. Sobre a non adaptación do proxecto á presente convocatoria de subvencións

Como se observa no contido do proxecto, este foi modificado a escasos días do remate do prazo de presentación de solicitudes para adaptalo á presente convocatoria de subvencións ao abeiro de Plan Provincia Extraordinaria 2025 (Plan Extra 2025), tal e como se recolle na páxina 5 do proxecto presentado : *“En decembro do 2021 o Concello de Cambados encárgalle ó estudio de Paula Alfonso arquitectura o proxecto básico e de execución para a construción dun skatepark con bowl e zona adicada a parkour no Pombal, Cambados.*

En febreiro do 2022 esta arquitecta presenta un proxecto básico e de execución de skatepark con bowl e zona de parkour no Pombal.

Posteriormente, encárganlle a redacción dun modificado para adaptar este proxecto a una subvención destinada a promover estilos de vida saudables a través da creación de entornos saudables.

En outubro do 2022 esta arquitecta presenta un proxecto básico e de execución de acondicionamento de entorno para zonas de xogo activo seguro ó aire libre e práctica de actividades físicas funcionais con zona de lecer, skate park con bowl e zona de parkour e calistenia no Pombal.

Posteriormente solicitan a tradución deste proxecto ó castelán para concorrer a dita subvención, de fondos europeos.

O 26 de outubro do 2025 solicitan facer un novo modificado para encaixar o proxecto no plan provincia extraordinario da deputación de Pontevedra. Tendo en conta o tempo transcorrido, procedemos a



actualizar prezos, normativa, xestión de residuos e outros parámetros necesarios para encaixar esta redacción na subvención referida".

Por tanto, estase a recoñecer expresamente que se trata dun proxecto xa existente, pero que foi pensado e redactado para cumprir os requisitos doutras convocatorias diferentes á do Plan Extra 2025. É dicir, non se trata dun proxecto ideado orixinariamente para acollerse a esta convocatoria senón que está deseñado para cumprir os requisitos esixidos noutras convocatorias doutros plans radicalmente diferentes.

Igualmente despréndese do anterior e da documentación que obra no expediente que tampouco recibiu subvención doutras convocatorias, polo que non é a primeira vez que este proxecto non resultou subvencionado.

Do contido expreso do proxecto, constátase que desde decembro do 2021, mantense expresamente o criterio técnico da innecesariedade do estudo xeotécnico, incluso tras revisar o proxecto en varias ocasións e anualidades, polo que se trata dun criterio técnico adoptado de forma consciente, xustificada e razoadamente por técnicos competentes na materia.

Ademais, queda de manifesto que por parte do concello se encargou a adaptación do proxecto á convocatoria específica do Plan Extra 2025 cun marxe de tempo de apenas uns días (encárgase o 26 de outubro e o 30 de outubro aprobouse o proxecto polo concello), a pesar de que a convocatoria foi publicada case un mes antes. Neste escaso marxe de tempo o resultado foi unha adaptación infrutuosa do proxecto, xa que se incumpriu un requisito esencial básico que se esixe con claridade e de forma indubitada nas bases do Plan.

En suma, a pesar de recoñecer que os traballos de adaptación se realizan especificamente para cumprir as Bases e convocatoria do Plan Extra 2025, dita adaptación tivo como resultado final un proxecto que non cumpre, de maneira clara indubitada, un requisito esencial básico e totalmente obxectivo, que vén esixido nas bases e convocatoria do Plan, ao non acadar o importe mínimo esixido.

QUINTO. Motivación da exclusión e da ausencia de requirimento consonte o artigo 68 da LPACAP

O Concello manifesta que a resolución vulnera o establecido nas bases reguladoras, xa que a expresión "exclusión directa" só ven recollida na base décimo primeira, e referido á non presentación dalgún dos documentos que se expoñen na mesma. O Concello tamén manifesta un incumprimento da base 7ª das reguladoras, en concordancia co establecido no artigo 68 da Lei 39/2015, do 1 de outubro, dado que non se lle requiriu esta cuestión no curso de procedemento.

A base sexta das reguladoras do procedemento de concesión de subvencións expresa que: "(...) valoraranse as solicitudes por orde decrecente de puntuación e asignaráselles o máximo financiamento posible ata esgotar o crédito do plan. 6.1 Quedarán excluídas aquelas solicitudes que: - Incumpran as bases da convocatoria; - Non se acollan ao obxecto subvencionable (...)".



O proxecto presentado polo concello de Cambados é un proxecto completo e válido, que por tanto non necesita que se lle requira formalmente que realice a emenda de aspectos que teñan o carácter de emendables, xa que non se detectaron. Non obstante, trátase dun proxecto que incumpre radicalmente un requisito esencial como é o importe mínimo do orzamento. Este requisito é unha condición de acceso á subvención de carácter esencial e ineludible, que debe cumprirse no momento do fin do prazo de solicitudes, como resulta natural nun procedemento de concorrència competitiva en virtude dos principios de igualdade, concorrència e competitividade que rexen este tipo de procedementos.

É dicir, ao non presentar un proxecto cun mínimo de 450.000 € de orzamento de licitación, tal e como se establece na base quinta, o Concello está incumprindo as bases da convocatoria. Por iso, en aplicación do disposto na base sexta, a solicitude queda excluída e non procede a súa valoración por parte da Comisión de Persoas Expertas, ao tratarse dun requisito esencial. Este é o sentido da expresión “exclusión directa” expresado na resolución de desestimación da subvención.

Cómpre sinalar que este requisito non ten carácter emendable, dado que suporía unha modificación substancial do contido da solicitude presentada. Neste sentido, o órgano instructor non pode requirir o incremento do orzamento de licitación dunha obra, xa que tal actuación implicaría alterar a realidade económica do proxecto coa finalidade de axustalo artificialmente aos requisitos da convocatoria.

Un requirimento nestes termos vulneraría os principios de legalidade, ao non estar amparado pola normativa reguladora; de igualdade de trato, ao supoñer unha vantaxe respecto doutros solicitantes que presentaron as súas solicitudes conforme ás bases; e de obxectividade e imparcialidade, ao intervir na configuración substancial da solicitude, e máis tratándose dun procedemento de concorrència competitiva.

Así mesmo, constitúe unha desviación de poder empregar as potestades administrativas para un fin distinto do previsto, que non pode ser outro que a comprobación do cumprimento dos requisitos establecidos nas bases. Ademais, promover un incremento inxustificado do orzamento sería contrario aos principios de eficiencia e boa xestión dos fondos públicos, así como ao deber de veracidade na determinación do custo real das actuacións.

SEXTO. Sobre a inexistencia dun estudo xeolóxico e xeotécnico e hipotética necesidade de realizar cambios no proxecto fóra de prazo

O Concello manifesta que a resolución de desestimación da concesión da subvención vulnera o establecido no artigo 88 da Lei 39/2015, do 1 de outubro, xa que non se decidiu sobre todas as cuestións formuladas, vulnerando os principios de boa fe, confianza lexítima e lealdade institucional, xa que na data 25 de marzo de 2026 achegaron o proxecto corrixido engadindo a conveniencia de realizar un estudo xeolóxico e xeotécnico que aínda non se realizou, o que, ademais, supón un cambio radical no criterio técnico sostido repetidamente no proxecto co único fin de alterar o orzamento resultante, argumentando hipoteticamente a posibilidade de que se dean unhas circunstancias tras a



realización no futuro de dito estudo que supoñerían unhas implicacións económicas (duplicar o tempo de man de obra e maquinaria, así como o cambio dunha pala, por outra cinco veces máis custosa, na partida 2.1 do proxecto) xusto polo importe necesario para alcanzar o orzamento mínimo esixido na convocatoria do Plan Provincia Extraordinaria 2025 (Plan Extra 2025).

Non obstante, este cambio de criterio non se atopa xustificado, xa que se trata dunha mera hipótese que se pode confirmar ou non tras a realización dun estudo xeolóxico e xeotécnico no futuro, cuestión esta, que de obrar o concello coa dilixencia debida podería ter feito con moita anterioridade e que non fixo porque expresamente considerou innecesaria a súa realización de forma clara, expresa, razoada e consciente.

O prazo de presentación de solicitudes rematou o día 03 de novembro de 2025, unha vez transcorrido o mes establecido desde a publicación das bases reguladoras e convocatoria do Plan Provincia Extraordinaria 2025 (Plan Extra 2025) no Boletín Oficial da Provincia de Pontevedra. En consecuencia, a documentación presentada fóra do prazo ten a consideración de extemporánea, non tratándose de documentación que persegue a emenda de requisitos meramente formais esixidos polas bases, senón que se trata dun cambio de proxecto que persegue un fin non permitido, como é alterar os prazos para o cumprimento dun requisito de carácter esencial, cambiándose o proxecto para incrementar o seu orzamento, cando no propio proxecto presentado se prevía e xustificaba clara e expresamente a innecesariedade de incrementar o seu custo.

O día 17 de marzo de 2026 convocouse a Comisión Informativa de Cooperación Local, Transfronteiriza, e de Coordinación das Emerxencias Provinciais, para coñecer da proposta de resolución de concesión e desestimación de subvencións ao abeiro do Plan Extra 2025, cuxa sesión tivo lugar o 20 de marzo. Nesa mesma data, a Comisión informativa emitiu ditame favorable con carácter previo á súa elevación ao Pleno, celebrado o día 27 de marzo. Polo tanto, o procedemento xa se atopaba nun estado avanzado de tramitación, de maneira que a presentación de documentación case cinco meses despois da finalización do prazo de solicitudes e catro días despois da emisión do Ditame da Comisión Informativa resultaba claramente extemporánea.

Ademais, no proxecto orixinal achegado o día 31 de outubro de 2025 recóllese expresamente, na páxina 32, a innecesariedade de elaborar un estudo xeolóxico e xeotécnico: *"Dadas as características do proxecto non se considera necesario a realización de ningún estudo xeotécnico. Non obstante, contamos con suficiente información para poder facer unha aproximación ás características do terreo"*. Incluso se xustifica tecnicamente esta decisión en base aos aspectos recollidos no punto 6 do proxecto, chegando a concluírse sen lugar a dúbidas: *"[...] este estudio de arquitectura desenvolve nos últimos 3 anos proxectos en zonas a menos de 100 metros da zona de actuación [...]"*. Tamén se expón claramente no proxecto orixinario que *"existe un plan especial de reforma interior que desenvolve a unidade de xestión 1, O Pombal, que especifica claramente as cargas admitidas"*. Por tanto, esta xustificación expresa deixa constancia de que non se trata dun erro, senón dun criterio técnico avalado e razoado, quedando acreditado, por tanto, que a decisión de non incluír a necesidade deste estudo foi tecnicamente meditada, reflexionada e xustificada expresamente segundo o parecer de técnicos con competencia da materia.



A necesidade de incorporar un estudo xeolóxico e xeotécnico foi recollida posteriormente no proxecto presentado o día 25 de marzo de 2026, co obxecto de incrementar o custo da actuación e así cumprir un requisito esencial do Plan Extra 2025, xustamente nun momento no que se dispoñía de información pública que indicaba que este incumprimento operaría para este caso en concreto como causa de exclusión.

Ademais, no proxecto presentado o 25 de marzo, así como no informe do arquitecto municipal achegado o día 18 de marzo, constátase que a inclusión deste estudo xeolóxico e xeotécnico unicamente ten implicacións económicas na partida "2.1 Excavación mecánica terreo floxo" que pasa a ser "2.1 Excavación ó descuberto con medio mecánicos". O informe do arquitecto municipal transcríbese a continuación: "(...) O técnico que subscribe este informe considera, en base á normativa e á boa práctica, que resulta necesario realizar un estudo xeolóxico e xeotécnico, e que, en ausencia do mesmo o proxecto deberá modificarse, con carácter previo á licitación, de cara a contemplar o escenario máis desfavorable dos que sexa razoable atopar no lugar; de modo que non se produzan desviacións no proxecto que deriven na modificación do contrato en fase de execución e/ou a inviabilidade das obras, incluso a necesidade dunha nova licitación.

Así, atendendo ao feito de que a zona en cuestión foi "gañada ao mar" mediante recheo fai varias décadas (perfectamente apreciable na foto aérea de 1956), a falta de estudo xeolóxico e xeotécnico debería considerarse que o tipo de excavación a realizar a orzamentar debe ser en tipo de solo arxiloso duro, con grava compacta.

As implicacións económicas deste cambio na consideración do terreo conleva un incremento na unidade AA unidade de obra 2.1, do capítulo 2 Movemento de terras, pasará de 3,10 €/m³ a 20,05 €/m³, para un total de 887,50 m³ de excavación".

É dicir, sen proceder á modificación das medicións nesta partida, cámbianse os prezos unitarios, que pasan dun custo de 3,10 € a 22,97 €, tal e como se observa na comparativa de partidas presentes no proxecto achegado o día 31 de outubro de 2025, e no proxecto achegado o día 25 de marzo de 2026, que se expón a continuación:

2.1	m³	Excavación ao descuberto, en terreo de consistencia frouxa e recheos antrópicos, con escavadora de 2 m3. de capacidade de culler, con extracción de terra aos bordos e carga de excedente en camión dumper 25tm, 16m3 tracc. tot, en baleiro, i/p.p. de custos indirectos.		
0,13	h	Retrocargadora sobre pneumáticos de 70 kW	14,92	1,94
0,05	h	Peón ordinario construción	20,14	1,01
2,00	%	Custos directos complementarios	2,95	0,06
3,00	%	Costes indirectos	3,01	0,09
Prezo total redondeado por m³ :			3,10	



2.1	m ³	Escavación ao descuberto, en terreo de arxila dura con grava compacta, con medios mecánicos (máquina retroescavadora con martelo), con extracción de terra aos bordos e carga de excedente en camión dumper, i/p.p. de custos indirectos.		
0,27	h	Retroescavadora sobre neumáticos, de 85 kW, con martelo rompedor.	73,50	19,85
0,10	h	Peón ordinario construción	20,14	2,01
2,00	%	Custos directos complementarios	21,86	0,44
3,00	%	Costes indirectos	22,30	0,67
Prezo total redondeado por ud :			22,97	

Proxecto	Medición (m ³)	Prezo unitario (€/m ³)	Total partida (€)
Orixinal	887,50	3,10	2.751,25
Modificado	887,50	22,97	20.385,88

(*A estas cantidades habería que sumar o importe dos gastos xerais, beneficio industrial e IVE)

Isto débese a que dentro desta partida duplícase o tempo de man de obra e maquinaria, así como o cambio dunha pala por outra unhas cinco veces máis custosa, sen que exista apoio documental real para a realización destes cambios nin xustificación do seu custo, xa que o estudo sobre o que se quere apoiar esta argumentación aínda non se realizou e ademais, con anterioridade se fixo unha completa xustificación da súa innecesariedade.

O feito de que exista un cambio de criterio técnico sobre a base dun estudo que aínda non se realizou e xusto no momento inmediato á resolución desestimatoria desta axuda, evidencia que a razón pola que se fai é unicamente tratar de reverter o incumprimento dun requisito esencial e intentar xustificar a alteración do orzamento do proxecto para tratar de cumprir un requisito fóra do prazo establecido nas bases.

Como se observa, a xustificación da inclusión dun estudo xeolóxico e xeotécnico, motivándoo co incremento do custe na partida anteriormente mencionada, carece de xustificación, xa que no proxecto reformulado enviado o día 25 de marzo non se inclúe dito estudo xeolóxico e xeotécnico, e queda condicionada á súa realización nun momento posterior, tal e como se recolle na páxina 32 do mencionado proxecto : "(...) *Así pois, eliminamos a xustificación anterior, e reiteramos a necesidade de realización dun estudio xeotécnico que apoie este argumento, que se aportará ó expediente tan pronto coñezamos os resultados (...)*"

En consecuencia, o órgano instructor non pode admitir esta documentación, por resultar extemporánea, por non tratarse dun erro material cuxa apreciación se desprende da documentación obrante no propio expediente e por carecer de xustificación suficiente, xa que no proxecto orixinal tómanse os datos xa obtidos do Plan Especial de Reforma Interior de O Pombal para facer unha estimación da capacidade portante do terreo e define tres tipoloxías de terreo en base a estudos xeotécnicos previos realizados que, segundo indica o propio proxecto, fixéronse "*nos últimos tres anos*" e "*a menos de 100 metros da zona de actuación*". Tendo en conta esta información, se conclúe coa definición das tipoloxías de tratamento do terreo para a correcta realización das actuacións proxectadas.



En base ós datos aportados e á toma de decisións respecto ás actuacións que involucran a capacidade portante do terreo, o propio proxecto considera unha suficiente definición do terreo e polo tanto xustifica a non necesidade dun estudo xeotécnico.

Por outra banda, o Concello enlaza esta idea co expresado na base 18ª das reguladoras do procedemento, que establece os supostos e regras para proceder á reformulación dos proxectos técnicos unha vez concedida a subvención; é dicir, para proxectos que cumpren os requisitos de subvencionabilidade e baixo unha serie de circunstancias debidamente acreditadas e xustificadas, e non en base a conxeturas ou hipóteses non contrastadas. Neste senso, a reformulación en ningún caso pode usarse para intentar eludir o cumprimento dun requisito esencial e non emendable, que debe cumprirse dentro do prazo de presentación de solicitudes, para intentar cumprilo moi posteriormente, case cinco meses fóra do prazo establecido, e así poder obter a subvención, xa que isto suporía unha clara desviación de poder ó apartarse da finalidade pretendida.

Ademais, non se trata dunha evidencia real da existencia dun erro material no proxecto, deducible de maneira natural e sen esforzos interpretativos a partir do contido do propio proxecto, senón que se intenta xustificar a posible conveniencia de modificalo coa finalidade de realizar un estudo xeotécnico, mediante a duplicación do tempo de man de obra e maquinaria, así como o cambio dunha pala por outra unhas cinco veces máis custosa na partida 2.1 do proxecto. É dicir, xustifícase este cambio con argumentos non concluíntes, carentes de soporte documental e baseados en meras hipóteses. Así, prodúcese unha modificación do criterio técnico que contradí o recollido na documentación achegada en prazo, sen que se achegue o estudo mencionado, cuxa presentación se difire a un momento posterior. Ademais, a motivación alegada responde unicamente á vontade de prever un hipotético escenario no que puidese resultar necesario, co fin de evitar futuras modificacións durante a execución da obra, o que acentúa o verdadeiro fin perseguido, que sería o incremento do custo do proxecto para acadar o cumprimento dun requisito esencial fóra do prazo previsto nas bases.

Así mesmo, tampouco queda acreditada a necesidade deste estudo xeolóxico e xeotécnico no proxecto achegado o 25 de marzo, tal e como se recolle na páxina 32 do 3º modificado do proxecto: “[...] aconsella realizar un estudo xeotécnico riguroso que confirme os novos supostos ...], [...] suxiren que o tipo de terreo pode ser diferente [...]”, e precisamente se fai esta recomendación tras coñecer que o proxecto non sería subvencionable, argumentando unhas circunstancias que perfectamente podían terse previsto con moita anterioridade, na fase de presentación do proxecto orixinal ou incluso desde o ano 2021 cando se encarga o proxecto orixinal e nas sucesivas adaptacións que se volven ratificar na idea da non necesidade do estudo, o que evidencia que a nova argumentación se trata dunha suxerencia, recomendación ou intento de xustificación de cambio cuxo fin único é alterar o importe do proxecto para intentar cumprir de forma extemporánea un requisito esencial que se incumpriu de forma manifesta.

SÉTIMO. Ratificación da motivación da desestimación da subvención

Finalmente, o Concello manifesta que a solicitude presentada cumpre cos requisitos esenciais de fondo sobre a finalidade e carácter das actuacións subvencionables, dado que acreditan que o



proxecto ten un impacto significativo sobre o ámbito territorial concreto, e que se trata dun proxecto estratéxico, desde o punto de vista do contido material do proxecto. Non obstante, este proxecto non acada o importe mínimo necesario e por tanto non pode considerarse que reúne todos os requisitos esixidos para ser un proxecto subvencionable.

Como xa se expresou ao longo desta resolución, a motivación da desestimación da concesión de subvención ao abeiro do Plan Provincia Extraordinaria 2025 (Plan Extra 2025) ao Concello de Cambados nada ten que ver cun pronunciamento sobre o impacto ou o carácter estratéxico da actuación.

A exclusión débese unicamente a factores obxectivos, concretamente ao incumprimento das bases reguladoras ao non presentar un proxecto cun orzamento de licitación igual ou superior ao mínimo establecido na base 5ª, cuestión que é esencial e non emendable, polo que procede a súa exclusión, tal e como se recolle na base 6ª.

III. RÉXIME COMPETENCIAL

De acordo co establecido no artigo 123 da LPACAP, a competencia para resolver é a do mesmo órgano que ditou a resolución impugnada, neste caso o Pleno da Deputación.

CONCLUSIÓN

Polo exposto, proponse desestimar o recurso de reposición interposto polo Concello de Cambados contra o acordo número 5.8616 do Pleno da Deputación Provincial da sesión ordinaria de 27/03/2026 no que se acordaba, entre outros extremos, a exclusión do referido Concello do Plan Provincia Extraordinaria 2025 (Plan Extra 2025).

De acordo cos antecedentes e os fundamentos de dereito, xunto á conclusión, no exercicio das competencias recollidas no art. 35 da LRBRL, no artigo 63 do ROFRXEL e as Bases específicas de execución do orzamento para o vixente exercicio, e vistos os informes do xefe de Servizo de Cooperación (CSV: C3NASORWOAC8UY8Q), da Secretaría Xeral (CSV: EVT69BQV231K2lgD), e a dilixencia de conformidade da Intervención (CSV: 76KCHPJCoO59DGC), sométese ao ditame da Comisión Informativa de Cooperación Local, Transfronteiriza e de Coordinación das Emerxencias Provinciais a seguinte PROPOSTA DE ACORDO:

- DESESTIMAR o recurso de reposición interposto polo concello de Cambados contra o acordo número 5.8616 do Pleno da Deputación Provincial da sesión ordinaria de 27/03/2026 no que se acordaba, entre outros extremos, a exclusión do Concello de Cambados do Plan Provincia Extraordinaria 2025 (Plan Extra 2025)
- DAR TRASLADO do presente acordo ao Concello de Cambados, á Intervención, ao Servizo de Cooperación e ao Gabinete da Presidencia."



Sometido a votación este asunto, a Comisión Informativa de Cooperación Local, Transfronteiriza e de Coordinación das Emerxencias Provinciais, ditamina favorablemente, cos votos a favor dos/as deputados/as do Grupo Provincial do PP (9), a abstención do do Grupo Provincial do PSdeG-PSOE (6), e a abstención do Grupo Provincial do BNG (2).

5. Rogos e preguntas

Non houbo

E non habendo máis asuntos que tratar, a Presidencia dá por finalizada a reunión, sendo as doce horas e quince minutos, do que, como secretario, dou fe.

Pontevedra, na data da sinatura electrónica

O secretario da Comisión,

Marcos Areán González

